

Weihnachtsplatzerl

Warum se heut Frauen noch de Riesenarbat macha
und eigenhändig Weihnachtsguatl macha –
warum ma se soicherer Müah unterziagt,
obwohl ma doch alles zu kaufen kriagt?

I hab mi beim Nachdenka ehrlich gschunden
und hab dafür doch Begründunga gfunden:

Des Platzlbacha is koa leere Betätigung,
des is für de Frauen a Selbstbestätigung,
daß ma no umgeh ko - wens so weit kimmt -
mit Muich und mit Mehl und mit Zucker und Zimt.

Aber ned grad des Zambringa macht a Freid,
vui mehra no 's Weitergebn an andere Leit.
Ma biat s' der Schwiegertochter und Nachbarin o,
damit de aa sehng, daß mas vorzüglich ko.

Denn jede Hausfrau is stolz, a wengerl,
auf ihre selberbachern Sterndl und Engerl.
Ja manchmoi, des hab i scho öfter belauscht,
da wern dann de Platzerl mit Neugierde 'tauscht.

Und jede lobt laut, was de andere bacht,
wobei aber jede de Feststellung macht:
Der andern ihre Platzerl, ja, manche san hochfein –
aaaber am besten ... schmecka halt doch ... de mein'.

(Leopold Kammerer)

